

INFO BUSINESS NEWSLETTER

Udruženje poslodavaca FBiH

Juni 2013. godine

Broj 14

• Udruženje poslodavaca FBiH od Vlade traži nastavak rada Ekonomsko-socijalnog vijeća FBiH

• Održana XII proširena sjednica U.O. UP FBiH u Tešnju

• Okrugli stol - Kolektivno pregovaranje i kolektivni ugovori — u Sarajevu



Udruženje poslodavaca FBiH od Vlade traži nastavak rada Ekonomsko-socijalnog vijeća



Upravni odbor Udruženja poslodavaca FBiH na svojoj zadnjoj sjednici održanom u Posušju, uz učešće 35 predstavnika kompanija iz ZHK, jednoglasno je zaključio da se zastoj u radu ESV negativno odrazio na status privrednih subjekata i narušio poslovni ambijent.

Zadnja sjednica ESV-a za područje FBiH, održana je prije gotovo 4 mjeseca. U tom periodu dva puta Udruženje je tražilo nastavaka rada ESV-a, ali smo od strane Predsjednika ESV-a obaviješteni da Delegacija Vlade FBiH u ESV, smatra da se nisu stekli uslovi za nastavak rada.

Trudeći se razumjeti okolnosti u kojima trenutno djeluje Vlada FBiH, te problemi sa započetim i nezavršenim postupkom rekonstrukcije Vlade FBiH, duboko smo ubijeđeni da ekonomsko-socijalni odnosi ne bi smjeli da, zbog toga, trpe.

Dosadašnji uspješan rad ESV-a, dao nadu da će pozitivni tokovi reformi, u oblastima koje su u nadležnosti ESV-a FBiH, dobiti novi zamah i time značajno doprinijeti društvenom i ekonomskom razvoju u FBiH. Na žalost taj pozitivan trend, je četveromjesečnim zastojem u radu ESV-a, zaustavljen.

Ukoliko bi se ovakva situacija nastavila i u narednom periodu, s pravom možemo očekivati da će dostignuti napredak u cijelosti biti devalviran.

Udruženje poslodavaca FBiH očekuje da će sjednica Kolegija ESV-a za područje FBiH biti hitno zakazana, te da se naći način za deblokadu rada ESV-a. Sigurni smo da bi hitan nastavak rada ESV-a, makar i u reduciranom obliku, bio veoma pozitivan signal, ne samo poslodavcima i radnicima nego i najširoj javnosti.

Održana XII proširena sjednica Upravnog odbora UP FBiH u Tešnju

Početkom juna mjeseca održana je XII proširena sjednica Upravnog odbora Udruženja poslodavaca Federacije BiH. Sjednica je održana u prostorijama kompanije "Koteks" u Tešnju. Pored predstavnika U.O. UP FBiH i članova Ekonomsko socijalnog vijeća FBiH sjednici su šrisustvovali i predstavnici lokalne vlasti, predstavnici poslodavaca iz lokalne sredine, te mediji. Samo organizaciju XII proširene sjednice pomoglo je Udruženje privrednika Biznis Centar Jelah/Tešanj, kolektivni član UP FBiH.

Na sjednici se raspravljalo o slijedećim tačkama; Zakon o štrajku, Zakon o sigurnosti i zdravlju na radu, Zakonu o porezu na dobit, Zakonu o rokovima ispunjenja novčanih obveza FBiH, te o tačkama koje je kandidovalo Udruženje privrednika Biznis Centar Jelah/Tešanj.

Prije održavanja i zvaničnog početka sjednice, vlasnik kompanije "Koteks" d.o.o. Iz Tešnja je upriličio kratku prezentaciju proizvoda i aktivnosti kojim se bavi ova kompanija



Vejsil Huremović, član U.O. UPFBiH

učesnicima, kao i primjedbe udruženja poslodavaca, da bi se naknadno organizovala još jedna rasprava po svim prijedlozima.

Ministarstvu su dostavljene primjedbe iznesene na samom sastanku dok je kolega Mirsad Čolaković, naknadno dostavio mnogo detaljnije primjedbe na isti tekst zakona, pa su i one prosljeđene u Ministarstvo.

Vejsil Huremović, član Radne grupe za izradu Nacrta Zakona o štrajku prisutnima je prezentirao Izvještaj o radu ove Radne grupe.

Federalno ministarstvo rada i socijalne politike je u skladu sa zaključkom ekonomsko-socijalnog vijeća, prvu raspravu o prednacrtu Zakona o štrajku zakazalo 12.02.2013. godine u prostorijama ministarstva. Na sastanku je pored predstavnika ministarstva, bila prisutna i petočlana delegacija sindikata, dok je ispred Udruženja poslodavaca FBiH bio prisutan jedan član.

Predstavnici sindikata su na samom sastanku iznijeli svoje primjedbe na ponuđeni tekst novog Zakona o štrajku i praktično su imali primjedbe ili konkretne prijedloge za izmjenu i dopunu skoro svih članova. Osnovna intencija u navedenim stavovima sindikata bila je da se radnicima omogući što lakše organizovanje štrajkova, kao i da se pri tome obaveze poslodavaca povećaju u pogledu nekih naknada.

Ispred udruženja poslodavaca su iznesene konkretne primjedbe koje su ranije verifikovane na sjednici Upravnog odbora i svaka je detaljno obrazložena, tako da ni predstavnici sindikata nisu imali valjanih kontraargumenata. Međutim, s obzirom na brojnost sindikalnih primjedbi zaključeno je da se iste ne mogu tretirati na ovom sastanku već da se iste dostave svim



Hazim Zečević, Generalni sekretar UPKP FBiH

Tačku dnevnog reda koja govori o Zakonu o sigurnosti i zaštiti na radu prezentovao je Hazim Zečević, Generalni sekretar Udruženja poslodavaca komunalne privrede FBiH. Hazim Zečević je član Radne grupe ispred UP FBiH koja radi na pripremi donošenja Zakona o sigurnosti i zdravlju na radu

Na Nacrt Zakona o sigurnosti i zdravlju na radu, Stručni tim UPKP FBiH je sačinio i dostavio ESV-u i UPFBiH, svoj komentar i primjedbe, koji su razmatrani na sjednici ESV.

S obzirom na značaj ovog Zakona, na broj i suštinu primjedbi i Udruženja poslodavaca FBiH, dogovoreno je da se formira Radna grupa od predstavnika Ministarstva, Sindikata, UPKP FBiH i UPFBiH, radi sagledavanja stavova i poboljšanja teksta Zakona.

Prvi sastanak Radne grupe održan je 18.01.2013. godine u Federalnom ministarstvu za rad i socijalnu politiku. Na sastanku smo došli do zaključka da Ministarstvo nije imalo stav po pitanjima i prijedlozima ostalih članova Radne grupe, te je dogovoreno da Ministarstvo do narednog sastanka definiše svoj stav.

Termin sljedećeg sastanka Radne grupe je tri puta odgađan, ali je Ministarstvo dostavilo novi tekst Zakona sa obrazloženjem da su usvojili većinu naših primjedbi i unijeli u Zakon.

Nakon pregleda novog teksta Zakona, ustanovili smo da su samo dvije, od naših 16. primjedbi i prijedloga prihvaćene.

Posebno naglašavamo da, u pogledu rasporeda radnika na radno mjesto koje odgovara njegovim zdravstvenim sposobnostima i vrlo visokim kaznama za poslodavca je materija koju regulira **Zakon o radu** i ne može se regulisati u dva Zakona na različite načine.

Radna grupa formirana na zahtjev ESV-a, da bi se usaglasile primjedbe socijalnih partnera, održala je svoj drugi sastanak 11.4.2013. godine u prostorijama Ministarstva rada i socijalne politike FBiH.

Dio primjedbi i prijedloga koje su dostavljene ispred UP FBiH su usaglašene i prihvaćene. Međutim, najbitnije primjedbe koje se odnose na član 22. tačka 5. i na članu 33. tačka 2. i član 52. tačka 3., **nisu prihvaćene**.

Ovi članovi se odnose na napuštanje radnika s radnog mjesta, ako ocijueni da mu prijeti opasnost. Posebno smo insistirali da se član 58 preformuliše. Kako da poslodavac rasporedi radnika na drugo radno mjesto ako takva mogućnost u preduzeću ne postoji. Sindikat je insistirao da ostane ovaj član, pa i po cijenu da se ovaj Zakon ne usvoji.

Mi smo insistirali da Ministarstvo preispita članove od 80. do 83., odnosno visinu kazni za pojedine prekršaje, jer su predložene kazne previsoke.

Ministarstvo je ostalo u obavezi da izradi prečišćeni tekst Nacrta Zakona i da unese usaglašene stavove. Do danas nismo dobili od Ministarstva ništa, a nakon telefonskog razgovora dobili smo obećanje da će novi tekst ovog Zakona izraditi iduće sedmice. Mi ćemo u svakom slučaju, nakon što nam se dostavi novi tekst Zakona, zauzeti naš stav i obavijestiti Upravni odbor UPFBiH, naveo je na kraju Zečević.

Udruženje poslodavaca FBiH je osposobilo svoju novu web stranicu na kojoj je ostavljen prostor za banere koji će se u budućnosti korsitit kao prostor za reklamiranje kompanija. Ovom prilikom Mladen Pandurević, direktor UP FBiH je napravio kratku informaciju o načinu na koji će to biti realizovano.

Baneri o kojima se govori se nalaze na web stranici Udruženja poslodavaca Federacije Bosne i Hercegovine: <http://www.upfbih.ba> i to:

1. Glavni baner sa pozicijom na desnoj front strani web sajta. Veličina banera je 7cm x 10cm (252px x 345px); Glavni baner bi sadržavao logo i osnovnu informaciju o kompaniji koja se reklamira. Klikom na baner ulazi se na posebnu stranicu koja ima informacije i sadržaj koje želi naručilac, kao i hiperlink koji sa stranice UPFBiH jednim klikom posjetioca šalje na oficijelnu web stranicu naručioca banera.

2. Manji LOGO sponzorski baner – veličina ovih banera varira u zavisnosti od preporučene veličine logo-a naručioca, a maksimalno 5cm x 2cm.

LOGO sponzorski baner ima za cilj da promoviše članice UPFBiH, a jednim klikom na LOGO posjetilac će biti prebačen na oficijelnu web stranicu kompanije sa čijeg se logo-a klikom tražio odziv.

Cijene koje stoje u odluci su pažljivo određene nakon istraživanja tržišta za oglašavanje na web stranicama koje imaju indikator posjete, te je u svrhu promovisanja kako UPFBiH, tako i njegovih članica određena cijena koja je na web marketing i PR tržištu apsolutno konkurentna i najpovoljnija, a po indikatoru broja pregleda web stranice na dnevnoj, sedmičnoj i mjesečnoj osnovi.



Članovi XII proširene sjednice Upravnog odbora UP FBiH



Predsjedavajući sto Sjednice Upravnog odbora UP FBiH

Na sjednici je pristvovao i Šefkija Botonjić, Predsjednik Privredne komore ZE-DO konatona koji je prisutnima prezentirao Novi Zakon o rokovima ispunjenja novčanih obveza FBiH koji je sačinila Privredna/gospodarska komora FBiH. Zakon urađen po uzoru na Zakon o izmirivanju novčanih potraživanja u Republici Hrvatskoj i isti uputila nadležnim organima na razmatranje.

Europski parlament i Vijeće Europske Unije donijeli su direktivu br. 2011/7, koja se odnosi na kašnjenja u izvršavanju obaveza u komercijalnim transakcijama 23.02.2011.godine, s tim da su države članice dužne implementirati istu u nacionalna zakonodavstva do 16.02.2013. godine.

Cilj direktive je sprečavanje zloupotrebe slobode ugovaranja na račun vjerovnika i pomoći posebno malim i srednjim poduzetnicima na unutarnjem tržištu. U BiH evidentirano je cca 60.000 blokiranih računa, od toga se na FBiH odnosi cca 65%. Dug prema malim i srednjim poduzećima, kojih u FBiH ima preko 99%, glavni je problem poduzetnicima u prevladavanju krize.

Članovi Upravnog odbora su raspravljali o prijedlogu ovog Zakona i navedeno je da uz manje izmjene Udruženje poslodavaca FBiH podržava aktivnosti i nastojanja Privredne/gospodarske komore FBiH.

Predsjednik Upravnog odbora UP FBiH je nakon izlaganja Predsjednika Privredne komore ZE-DO kantona prisutne informisao o procesu izrade Prednacrtu Zakona o porezu na dobit. Zadnja verzija Zakona je urađena 21. maja 2013. godine koja je distribuirana svim članovima Udruženja. Također je naveo da je na posljednjem sastanku prisustvovalo preko 30 predstavnika velikih kompanija u Federaciji BiH koji su Ministarstvu finansija prezentovali primjedbe na ovaj zakona, te raspravljali o članu 34. ovog Zakona koji se tiče Ukidanje članka u vezi poticaja izvoznika preko 30% ostvarenog prihoda je suprotno ozdravljenju cijele privrede.

Smatramo da bi ukidanje trenutno važećih poreznih olakšica imalo višestruko negativne i nenadoknadlejve posljedice na ukupnu privredu Federacije Bosne i Hercegovine.

Nakon održane sjednice prisutni su posjetili proizvodne pogone kompanije Koteks d.o.o. iz Tešnja.

Okrugli stol - Kolektivno pregovaranje i kolektivni ugovori -



International
Labour
Organization



U d r u ž e n j e
p o s l o d a v a c a

Udruženje poslodavaca FBiH i Međunarodna organizacija rada (ILO) organizuju Okrugli stol na temu „Kolektivno pregovaranje – kolektivni ugovori“. Okrugli stol će se održati **20. juna 2013. godine u hotelu „Hollywood“ (Dr. Pintola 23) u Sarajevu sa početkom u 10:30 časova.**

Ovom prilikom će aktivno učešće na ovom događaju uzeti gđin. Dragan Radić, viši expert za poslodavačka pitanja u Međunarodnoj organizaciji rada (ILO).

Okrugli sto je namjenjen predsjednicima i članovima uprava, odnosno osobama nadležnim za donošenje odluka. Ovo će biti izvanredna prilika da se ova kategorija menadžera upozna sa iskustvima iz zemalja Evropske Unije i zemalja okruženja koja se odnose na kolektivno pregovaranje i kolektivne ugovore.

Udruženje poslodavaca FBiH je na svojoj XI proširenoj sjednici Upravnog odbora donijelo Odluku o pokretanju inicijative za raskid svih granskih kolektivnih ugovora koje nije potpisalo ovo Udruženje. Zbog važnosti teme i same inicijative Udruženja poslodavaca bilo bi dobro da prisustvujete ovom Okruglom stolu na kojem ćemo vam prezentovati pregled stanja svih kolektivnih ugovora na području Federacije BiH.

Ovi ugovori koji su, najčešće, zaključeni bez učešća poslodavaca, uz priznavanje prava zaposlenicima koje gotovo ni jedan poslodavaca ne može ispuniti, jedan su od glavnih razloga izuzetno teškog položaja najvećeg broja poslodavaca. Ovakovo stanje, ukoliko se brzo ne promijeni, rezultiraće zatvaranjem velikog broja privrednih subjekata i enormnim gubitkom radnih mjesta.

Sastanak sa predstavnicima Energopetrola d.d. Sarajevo



Predstavnici Energopetrola d.d. Sarajevo i Udruženja poslodavaca FBiH

U petak 31.05.2013. je održan sastanak između predstavnika Udruženja poslodavaca Federacije Bosne i Hercegovine sa jedne i predstavnika Energopetrola d.d. Sarajevo (članica Mol grupacije) sa druge strane.

Ispred Udruženja poslodavaca sastanku su prisustvovali Mladen Pandurević, direktor , Haris Muslić član upravnog odbora UP FBiH i Seid Fijuljanin, koordinator za marketing i članstvo u UP FBiH, dok su ispred kompanije Energopetrol d.d. Sarajevo sastanku prisustvovali Miroslav Polak, izvršni direktor i Dino Duraković, rukovoditelj pravnih poslova.

Cilj ovog sastanka bio je da UPFBiH prezentuje svoje rezultate i napredak koji je učinjen u poslednjih nekoliko godina, te kroz konkretne primjere i aktivnosti u vidu izmijenjenih pravnih akata, propisa i primjedbi na aktuelne zakone koji se tiču privrednog sektora u Federaciji BiH. Predstavnici Udruženja svojoj firmi članici ukazala na potrebu da se aktivno uključi u rad Udruženja, iako je Energopetrol d.d. član UPFBiH od 2007. godine.

Spomenuta je činjenica da će uskoro biti pokrenuti pregovori o raskidanju granskog kolektivnog ugovora za djelatnost prerađivača nafte i naftnih proizvoda, te da bi u cilju ostvarivanja opšteg interesa poslodavaca iz ove grane, ali i poslodavaca uopšte, bilo poželjno da predstavnici Energopetrola d.d. budu vodeći pregovarači prilikom vođenja kolektivnih pregovora.

Nakon izraženog obostranog zadovoljstva i interesa na temu buduće aktivne saradnje dogovoreno je da se uskoro održi još jedan sastanak na kojem će se preduzeti sljedeći koraci na temu spomenutih akcija.

Održan sastanak i prezentacija amandmana na Zakon o radu

Dana 13. juna 2013. godine u Sali Općine Gračanica održan je sastanak na kojem je upriličena prezentacija amandmana na Zakon o radu, koje je pripremo tim diplomiranih pravnika.

Upravni odbor Udruženja poslodavaca Gračanica, zaključio je da postojeći Prijedlog Zakona o radu F BiH ima dosta odredbi koje su nepovoljne za poslodavce, koje ukoliko budu usvojene mogu negativno uticati na interes poslodavaca za zapošljavanjem novih radnika i otvoriti mogućnost za otpuštanjem velikog broja zaposlenih radnika.

Ovom prilikom se Udruženje poslodavaca općine Gračanica obratilo Udruženju poslodavaca FBiH tražeći stav i primjedbe na navedeni Zakon. Predsjednik Udruženja poslodavaca FBiH Safudin Čengić je prisustvovao ovom sastanku na kojem je iznio stavove i primjedbe koje je Udruženje pripremlilo.

Sastanku su pored naših predstavnika bili prisutni i privrednici općine Gračanica i druga relevantna lica i institucije za koje se smatralo da mogu pomoći u realizaciji pripremljenih amandmana.



Prezentacija aktivnosti Međunarodne finansijske korporacije (IFC) u Sarajevu



Prezentacija aktivnosti Međunarodne finansijske korporacije (IFC), članice Grupacije Svjetske banke, u Bosni i Hercegovini. Prezentacija će se održati u Sarajevu, **5.6.2013. godine, u prostorijama UN House Sarajevo, Zmaja od Bosne bb, sa početkom u 11 sati** i fokusirat će se na pregled investicijskog ciklusa IFC-a, kriterije za investiranje, kao i detaljniji opis metodologije

za unaprijeđenje korporativnog upravljanja u dioničkim društvima i porodičnim firmama.

IFC je u Bosni i Hercegovini prisutan od 1996. godine. Do sada je investirao značajna sredstva u razvoj realnog i finansijskog sektora, i podržao brojne inicijative važne za stvaranje boljeg poslovnog ambijenta, poput reforme politike direktnih stranih investicija, pojednostavljenja uvožno/izvoznih procedura i eliminacije ne-tarifnih barijera, do jačanja mehanizama trgovinske logistike u svim zemljama regiona. IFC ima za cilj da u budućnosti poveća obim investicija u BiH, ojača domaći privatni sektor i doprinese stvaranju novih radnih mjesta.

Informacija sa sastanka radne grupe za izradu Zakona o privrednim društvima u organizaciji IFC-a

U Konjicu je 29. i 30.05.2013. godine u organizaciji IFC-a organizovana radna grupa koja je nastavila sa radom na novom Zakonu o privrednim društvima Federacije Bosne i Hercegovine. Pored odabranih predstavnika iz Ministarstva finansija, Ministarstva privrede, Ministarstva poljoprivrede, vodoprivrede i šumarstva, Ministarstva energije, rudarstva i industrije, Ministarstva trgovine, Ministarstva razvoja, poduzetništva i obrta, Minsitarstva pravde, Inspeksijske službe Federacije BiH, bili su prisutni i predstavnici Udruženja poslodavaca Federacije Bosne i Hercegovine, te svojim inputom značajno doprinijeli diskusiji o zakonu i to u najviše u dijelu koji se tiče svakodnevnih problema sa kojima se privrednici, investitori i budući privrednici susreću i mogu susretati prilikom registracije i upravljanja privrednim društvom.

Postojeći Zakon o privredim društvima FBiH je sadržavao niz otežavajućih okolnosti za razvoj privrede u Federaciji, no prema potrebi da se isti zakon poboljša kako zbog opšteg poboljšanja stanja u privredi, tako i zbog međunarodnih obaveza koje uključuju i izmjenu principa i standarda u ovom zakonu. Radna grupa je nakon dvodnevne sesije i značajnog dijela koji je prerađen zakazala novi sastanak polovinom juna, na kojem će se nastaviti sa radom na zakonu sve dok u konačnici Zakon ne krene u procedure rasprave i usvajanja.



Članovi Radne grupe za izradu Zakona o privrednim društvima

Memorandum o razumjevanju i saradnji o pitanjima bitnim za djelatnost trgovine i usluga u FBiH



Predstavnici UP FBiH, Sindikata trgovine BiH, Konzuma d.d. Sarajevo i Agrocora

Dana 27.maja 2013. godine u Sarajevu Udruženje poslodavaca FBiH i Sindikat trgovine BiH potpisali su Memorandum o razumijevanju i saradnji o pitanjima bitnim za djelatnost trgovine i usluga u FBiH. Potpisivanje memoranduma upriličeno je u prostorijama „Konzuma“ d.d. u Sarajevu.

Ovim potpisivanjem Udruženje poslodavaca i Sindikat trgovine BiH će u budućim aktivnostima u okviru svojih nadležnosti raditi na kvalitetnijem ostvarivanju interesa svojih članova, poboljšavanju poslovnog ambijenta, a sve u cilju jačanja dobrobiti svog članstva.

Pored potpisnika memoranduma Mladena Pandurevića, direktora UP FBiH i Mersihe Beširević, predsjednice ST BiH događaju su pristvovali i David Dolinar, direktor Konzuma d.d. Sarajevo, Mato Greganić, izvršni direktor Agrocora, Safudin Čengiđ, predsjednik U.O. UP FBiH te predstavnici medija.

„Ovo je prvi korak ka pripremama za kolektivno pregovaranje. Udruženje trenutno radi na uspostavljanju Grupacije poslodavaca iz oblasti trgovine i nadamo se da će sve buduće dokumente za ovu granu potpisivati predsjednik te Grupacije“, istakao je Mladen Pandurević, direktor Udruženja poslodavaca FBiH.

Organizator samog događaja bio je Konzum d.d. Sarajevo koji je aktivan član Udruženja poslodavaca FBiH i u privrednom svijetu je prepoznat kao socijalno osjetljiv i društveno odgovoran poslodavac.

Posjeta Dragana Radića, višeg experta za poslodavačka pitanja u Međunarodnoj organizaciji rada (ILO)

Dana 19. juna 2013 godine u posjetu Udruženju dolazi Dragan Radić, viši expert za poslodavačka pitanja u Međunarodnoj organizaciji rada (ILO).

Razlog posjete jeste razgovori o kolektivnom pregovaranju i kolektivnim ugovorima u Federaciji Bosne i Hercegovine., te pripreme za okrugli stol koji će se održati dan kasnije.

Radić će također posjetiti i kompanije Lutrija BiH Sarajevo, Hidrogradnju Sarajevo i Arcerol Mittal Zenica i posjetu će iskoristiti za razgovore o kolektivnim ugovorima i njihovoj primjeni u tim kompanija.

Udruženje poslodavaca FBiH je na svojoj XI proširenoj sjednici Upravnog odbora UP FBiH donijelo odluku za raskid svih spornih granskih kolektivnih ugovora na teritoriji Federacije BiH. Udruženje poslodavaca FBiH je napravilo pregled i analizu svih spornih granskih Kolektivnih ugovora na području FBiH koje nije potpisano od strane Udruženja. Na nivou Federacije BiH postoji potpisano 18. granskih Kolektivnih ugovora i Opšti kolektivni ugovor za teritoriju FBiH.

Na sjednici je zaključeno da sa raskidom granskih

kolektivnih ugovora treba početi nakon što UPFBiH izvrši konsultacije sa članstvom i pripremi spisak prioriteta, pripremi obrazložene zahtjeve za raskid svih spornih kolektivnih ugovora.

Potrebno je u dogovoru sa vladom i sindikatom dogovori rokove važenja starih KU i rokove za potpisivanje novih, te ubrzati aktivnosti na formiranju preostalih grupacija unutar udruženja. Pored navedenih aktivnosti predstavnici Udruženja će insistirati da SSSBiH potpiše usaglašeni tekst izmjena i dopuna spornih kolektivnih ugovora.

Ukoliko socijalni partneri ne pokažu kooperativnost Udruženje poslodavaca u FBiH će pripremiti zahtjeve za sudsko raskidanje KU uključujući i opšti, uz obezbijeđenje sredstava za vođenje sudskih sporova, napraviti izvještaj za Vijeće Evrope o neusklađenosti domaćeg zakonodavstva sa konvencijama ILO, te zatražiti intervenciju ILO.

Sa Radićem će se ovom prilikom razgovarati i o navednoj inicijativi UP FBiH.



Održana Prva konferencija na temu „Strateški razvoj visokog obrazovanja i standardi kvalifikacija“



Dana 12. juna 2013. u Sarajevu održana je Prva konferencija zajedničkog projekta Evropske unije i Vijeća Europe na temu „Strateški razvoj visokog obrazovanja i standardi kvalifikacija“.

Na konferenciji su bili prisutni predstavnici Evropske Komisije, Vijeća Europe, Ministarstva civilnih poslova BiH, predstavnici univerziteta, te drugih relevantnih institucija u Bosni i Hercegovini. U svom uvodom izlaganju predstavnica Ministarstva civilnih poslova Daria Duilović je prisutnima predstavila dosadašnje rezultate i razvojne programe koji su provedeni kada je u pitanju visoko obrazovanje i standardi kvalifikacija. Sam cilj Konferencije jeste da se napravi pregled učinjenog napretka, najvećih prepreka i problema u reformi visokog obrazovanja do danas, te da se odrede prioritete za buduće akcije koje se trebaju tretirati u novom projektu koji finansiraju Evropska unija i Vijeće Europe. Projekt bi trebao pomoći BiH da ostvari jedan

od deklariranih ciljeva u strateškom planu razvoj za obrazovanje 2008-2015. - puno pristupanje Evropskom prostoru visokog obrazovanja (EHEA).

Fokus ovog projekta bit će izrada prioriteta za strateški razvoj visokog obrazovanja u BiH nakon 2015. godine, na osnovu analize sektora koja će se uraditi u projektu te izrada predmetnih deskriptora (benchmark statements) i standarda zanimanja u pet naučnih polja za niz zanimanja.

Jedan od zaključaka ove Konferencije jesu bolje i efikasnije promoviranje uspostavljanja boljih mehanizama za povezivanje obrazovnih institucija i tržišta rada, te da se pokušaju iznaći instrumenti za bolju zapošljivost. Navedeno je da ova Prva konferencija treba biti platforma za konsultacije između različitih aktera i partnera: akademske zajednice, studentskih unija, ministara obrazovanja, biroa za zapošljavanje, agencija za statistiku, međunarodnih organizacija, trgovinskih komora i sindikata.

Održavanje Okruglog stola na temu „prestrukturiranje kompanija metalnog sektora“ u Banja Luci



Forum metalne industrije BiH Форум металне индустрије БиХ

Forum metalne industrije BiH čine kompanije metalnog sektora BiH, Privredne komore u BiH, obrazovne, naučne i razvojne institucije, te referentni djelatnici u ovoj oblasti. Forum djeluje kroz Akcioni plan u realizaciji ciljeva definisanih Manifestom FMI BiH iz 2011. godine, prvenstveno na poboljšanju poslovnog ambijenta u BiH, te jačanja i razvoja metalnog sektora kao okosnice razvoja industrije u BiH.

Tematika Okruglog stola je prestrukturiranje kompanija kao značajni

pozitivni faktor uspješnog razvoja metalne industrije u BiH i u širem smislu tretira pozitivne promjene kompanija u oblastima: vlasničkih i organizovanih transformacija; tehničkih, proizvodnih i tehnoloških modernizacija; razvoja kapaciteta, asortimana, kvaliteta i certifikacije proizvoda; tržišne, marketinške, izvozne orijentacije; kadrovsko osposobljavanje; razvoj konkurentskih prednosti; zapošljavanja; ekonomsko i finansijsko pozitivno poslovanje i drugo.

Okrugli sto će razmotriti uticajne faktore na provođenje uspješnog prestrukturiranja kompanija, kao što su globalni eksterni faktori, interni faktori u nadležnosti državnih organa, faktori u domenu uprava i menadžmenta kompanija, inovativni faktori, angažman stručnih i naučnih institucija i drugo.

• CILJEVI OKRUGLOG STOLA:

Realna ocjena stanja u kompanijama metalnog sektora, uzroci i posljedice zastoja u procesima prestrukturiranja kompanija, prijedlozi za podsticaj aktivnosti u ovoj oblasti, zasnovan na stručnim, naučnim saznanjima i pozitivnim primjerima u praksi.

Zaključci i preporuke Okruglog stola će biti upućene direktno i putem medija, svim akterima u provođenju prestrukturiranja kompanija metalne industrije.

- **POZIV ZA SUDJELOVANJE NA OKRUGLOM STOLU** upućen je:
- Reprezentativnim kompanijama metalnog sektora u BiH
- Relevantnim ministarstvima Vlada u BiH
- Privrednim komorama u BiH
- Univerzitetima, fakultetima i institutima
- Udruženju poslodavaca FBiH i Uniji udruženja poslodavaca RS
- Agenciji za privatizaciju FBiH i Agenciji RS
- Operativnom timu Foruma metalne industrije BiH

SorS 2013: Osiguravajuća društva iz cijelog svijeta u Sarajevu



Društvena odgovornost djelatnosti osiguranja, liberalizacija tržišta osiguranja automobilske odgovornosti te banko osiguranje u funkciji razvoja tržišta osiguranja su glavne teme 24. SorS-a, tradicionalnog skupa osiguravajućih i reosiguravajućih društava, koji će se održati od 19. do 21. juna 2013. godine u Sarajevu.

Na SorS-u će biti prezentirano i stanje na tržištima osiguranja u BiH, Crnoj Gori, Hrvatskoj, Makedoniji, Sloveniji i Srbiji. Ovogodišnji SorS, koji se održava u sarajevskom hotelu Bristol, okupiće preko 150 predstavnika osiguravajućih društava iz zemalja regiona, a poseban značaj konferenciji daje i sudjelovanje većeg broja inostranih gostiju iz Velike Britanije, Njemačke, Austrije, Češke, Danske, Švicarske, Turske i drugih zemalja. Osim osiguravatelja, očekuje se prisustvo i predstavnika vlasti BiH, zatim institucija koje nadziru rad društava za osiguranje te udruženja osiguravajućih društava iz zemalja regiona.

U okviru osnovne teme ovogodišnjeg SorS-a bit će održana predavanja o društvenoj odgovornosti djelatnosti osiguranja, liberalizaciji tržišta osiguranja automobilske odgovornosti te banko osiguranju u funkciji razvoja tržišta osiguranja. Već tradicionalno na otvaranju

konferencije SorS predviđena je prezentacija stanja na tržištima osiguranja zemalja regiona te komparacija sektora osiguranja u zemljama nastalim na teritoriji bivše Jugoslavije. Zadnji dan konferencije održat će se dva okrugla stola na teme „Osiguravajuća zaštita putnika, pješaka i biciklista u cestovnom prometu“ te „Reosiguranje“.

"SorS je prilika da se na jednom mjestu susretne velik broj stručnjaka iz djelatnosti osiguranja. Tu su uvijek predstavnici najvećih društava za osiguranje i reosiguranje iz Evrope i regije. Jedno je sigurno, to je susret na kojem se u tri dana koncentrira gotovo cjelokupno znanje iz osiguranja i reosiguranja regije, ali i iz EU. Želite li upoznati ljude koji znaju svoj posao, ljude koji se osiguranjem bave kao univerzitetski profesori, ljude koji su doktorirali i magistrirali na teme iz osiguranja, onda to možete učiniti na SorS-u", izjavio je generalni sekretar SorS-a

Damir Lačević.

Prvi Susret osiguravača i reosiguravača je održan 1980. godine u Splitu, da bi već 1981. godine, uz isti naziv, susret održan u Sarajevu gdje je SorS održavan sve do 1990. godine. Nakon rata, SorS je obnovljen 2000. godine, a 2006. godine osnovano je Udruženje društava za osiguranje SorS, sa sjedištem u Sarajevu. Uz Udruženje društava za osiguranje SorS, organizator i medijski pokrovitelj SorS-a je tvrtka Tectus d.o.o., odnosno časopis "Svijet osiguranja". Upravni odbor Udruženja SorS čine predstavnici 14 društava iz Bosne i Hercegovine, Crne Gore, Hrvatske, Makedonije, Slovenije i Srbije.

Predsjednik Upravnog odbora Udruženja osiguravajućih društava SorS u ovoj godini je Vladimir Toševski, generalni direktor Osiguritelne Polise, a generalni sekretar Udruženja je Damir Lačević, direktor Bosna Re.

Bh kompanije i ove godine na sajmu "Ambijenta" u Zagrebu



(fena)Vanjskotrgovinska komora Bosne i Hercegovine (VTKBiH) , u partnerstvu sa USAID-Sida FIRMA projektom, planira organizirati zajednički nastup bosanskohercegovačkih firmi - proizvođača namještaja na Međunarodnom sajmu namještaja, unutarne uređenja i prateće industrije "AMBIENTA 2013", koji će biti održan od 16. do 20. oktobra ove godine u Zagrebu.

"AMBIENTA" se održava na izložbenom prostoru Zagrebačkog velesajma. "AMBIENTA" je okupljalište svih značajnih subjekata iz drvoprerađivačke industrije i industrije namještaja u Hrvatskoj i šire. Prošle godine na sajmu "AMBIENTA" je izlagao 341 izlagač iz 25 zemalja.

Kako ističu iz VTKBiH, bh. kompanije koje su izlagale na zajedničkom štandu Bosne i Hercegovine na sajmu "AMBIENTA 2012", u prvih šest mjeseci nakon nastupa ostvarile su izvoz u vrijednosti višoj od 300.000 KM, a do kraja godine očekuju realizaciju prodaje u vrijednosti od još 510.000 KM.

Na ovogodišnjoj "AMBIENTI", na zajedničkom štandu BiH, od 200 kvadratnih metara, planirano je izlaganje do sedam bh. firmi, a koje zadovoljavaju određene kriterije.

Firme zainteresirane za učešće na ovom sajmu , prije svega, treba da su proizvođači namještaja od punog drveta, tapaciranog, pločastog, metalnog ili namještaja od nekonvencijalnih materijala, te da imaju iskustvo u izvoznim poslovima i da su strateški opredijeljene za izvoz.

Održavanje manifestacije Ljetni Univerzitet Tuzla– LJUT 2013



Univerzitet u Tuzli organizira tradicionalnu manifestaciju Ljetni Univerzitet Tuzla - LJUT 2013, koja će se održati od 20. do 30. juna 2013. godine u Tuzli, BiH. Centralna tema ovogodišnjeg LJUT-a je "Visoko obrazovanje - tržište rada", koja će okupiti stručnjake iz zemlje i inostranstva.

Od samog osnivanja 1996. godine, LJUT promoviše ideje kulturne razmjene i akademske izvrsnosti, te stvara široku mrežu entuzijasta koji nastavljaju saradivati i nakon ove manifestacije. I ove godine LJUT nudi zanimljiv sadržaj koji će omogućiti razmjenu informacija i akumulaciju znanja, kako za studente, tako i za akademsko osoblje iz zemlje i inostranstva.

Obavještavamo Vas da Univerzitet u Tuzli u okviru centralne teme Ljetnog Univerziteta organizira okrugli sto "Visoko obrazovanje - tržište rada", koji će se održati 21.06.2013. godine. Bili bismo počastvovani ukoliko biste na navedenom događaju prezentirali dosadašnja iskustva u saradnji sa univerzitetima, ali i izložili viziju nastavka i poboljšanja iste.

U Mostaru održana konferencija o povoljnom poslovnom okruženju u FBiH

(fena)U organizaciji Federalnog ministarstva razvoja, poduzetništva i obrta, i u suradnji s Nacionalnom alijansom za lokalni ekonomski razvoj iz Srbije (NALED) te Njemačkim fondom za razvoj (GIZ) juče je u Mostaru održan prva godišnja konferencija pod nazivom "Povoljno poslovno okruženje u Federaciji Bosne i Hercegovine" (BFCFBiH).

Konferenciju je otvorio državni ministar vanjske trgovine i ekonomskih odnosa Mirko Šarović ističući važnost ove konferencije za stvaranje poslovnog okruženja kako u FBiH, tako i u BiH.

"Ova konferencija je vrlo važna, jer stvaranje poslovnog okruženja nije samo aktivnost jedne razine vlasti, već više razina. To je stalni proces u koji su uključene općine, županije, entitet te sama država", kazao je Šarović, ocijenivši kako se pozitivno poslovno okruženje može stvoriti ako je društvo u cjelini stabilno.

"Privlačni poslovni ambijent može se stvoriti ako je društvo u cjelini stabilno, počevši od stabilnih institucija pa do političke stabilnosti. Te stvari izravno utiču na atraktivnost BiH za investicije i na njima trebamo svi raditi, od lokalne do državne vlasti", kazao je Šarović.

Federalni ministar razvoja, poduzetništva i obrta Sanjin Halimović u izjavi za novinare kazao je kako je ova konferencija vrlo bitna radi promocije svega onoga što je dobro u stvaranju dobrog poslovnog okruženja u FBiH.

"Mi smo tome dali doprinos i danas smo zajedno s našim partnerima otvorili mogućnost novih projekata, prije svega za mlade i to omogućavanjem pogodnih start-up paketa financijske podrške za započinjanje poduzetničke aktivnosti", kazao je federalni ministar, istaknuvši kako je njegovo ministarstvo u zadnjih godinu dana uradilo na unapređenju poslovnog okruženja i više nego što je očekivano.

Na novinarski upit što podrazumijevaju ti start-up paketi, ministar je kazao da se to odnosi na pomaganjem mladih poduzetnika kroz plaćanje doprinosa za njihove uposlenike, preuzimanja teret obveza kod registracije tvrtki te subvencioniranja kamata na kredite.

Na konferenciji u Mostaru sudjeluje i ministrica uprave i lokalne samouprave RS-a Lejla Rešić koja je naglasila ulogu lokalnih zajednica u stvaranju pozitivnog poslovnog okruženja.

"Vrlo je važno raditi s lokalnim zajednicama jer, koliko su jake lokalne zajednica, toliko nam je jaka BiH. Sve privredne aktivnosti dešavaju se u lokalnim zajednicama i na nama je da im pomognemo da stvore dobar ambijent da rade i otvaraju nova radna mjesta", kazala je Rešić.

U sklopu konferencije upriličena je i promocija projekta certificiranja gradova i općina s povoljnim poslovnim okruženjem u Federaciji BiH s ciljem uvođenja jedinstvenog standarda u tom entitetu i cijeloj regiji kojim će se poboljšati djelotvornost lokalnih uprava. Tom je prigodom načelniku Sanskog Mosta Mustafi Avdagiću uručen certifikat, čime je njegova općina postala prva općina u FBiH koja je dobila certifikat općine s povoljnim poslovnim okruženjem.

"Izuzetna je stvar biti prvi u FBiH u nečem pozitivnom, a posebno biti prvi u FBiH s jednim ovakvim certifikatom. Općina Sanski Most je u zadnjih godinu i pol dana, od kada smo kandidirani za ovaj prestižni certifikat, učinili mnogo na poboljšanju poslovnih uvjeta. Procedure oko građevinskih dozvola i otvaranja poduzeća su izbalansirane, mnogo smo učinili u vezi industrijske zone, a komunikacija s gospodarstvenicima je dostigla vrlo visoku razinu. Također, formirali smo savjetodavno gospodarsko vijeće naše općine i donijeli smo niz povlastica za buduće poduzetnike koji će investirati", naveo je Avdagić.

Na današnjoj konferenciji predviđeno je i potpisivanje Sporazuma o uspostavljanju mreže za lokalni ekonomski razvoj u Federaciji BiH, koja će biti nositelj aktivnosti vezanih za certificiranje u entitetu. Članovi Mreže bit će Federalno ministarstvo razvoja, poduzetništva i obrta, Gospodarska komora FBiH, četiri regionalne razvojne agencije iz FBiH (REZ, NERDA, SERDA i REDAH) i Savez gradova i općina FBiH.



Mesna industrija „Ovako“ podijeliće 30.000 kilograma hrane



Tradicionalno, već osam godina zaredom, Mesna industrija Ovako u toku mjeseca Ramazana organizira podjelu donacija u mesu i mesnim prerađevinama za podjelu obroka socijalno ugroženim kategorijama stanovništva. Ove godine biće podijeljeno 30.000 kilograma hrane, a više informacija o načinu prijave biće dostupno na zvaničnoj web stranici Mesne industrije “Ovako” (www.ovako.ba).


“Interesovanje za akciju podjele donacija Mesne industrije “Ovako” raste iz godine u godinu kao i, nažalost, broj naših sugrađana koji su u stanju socijalne potrebe. Iz tog razloga, odlučili smo da ove godine podjelu organiziramo na nešto drugačiji način, putem javnog poziva na koji se mogu prijaviti sve organizacije, institucije i udruženja iz Bosne i Hercegovine čija djelatnost je briga o socijalno ugroženima. Želja nam je da cijeli proces bude maksimalno transparentan i da svi dobiju podjednaku priliku za dodjelu donacije u hrani” – rekao je Nedžad Biberović, koordinator marketinga Mesne industrije “Ovako”.

Zasluge za mogućnost podjele ovih donacija, iz Mesne industrije “Ovako”, prvenstveno pripisuju svojim vjernim kupcima i uposlenicima.

“Bez vjernih kupaca proizvoda Mesne industrije “Ovako”, sigurno ne bismo bili u mogućnosti dobro poslovati, a samim tim ni organizirati ovu akciju. Stoga, se od srca zahvaljujemo našim kupcima koji su suštinski donatori u ovom projektu. Također, veliko hvala i našim uposlenicima koji su uložili dodatne napore kako bi uspjeli proizvesti količine proizvoda potrebne za donaciju” – naglašava Tarik Mutevelić, menadžer izvoza M.I. Ovako.

Iz Mesne industrije “Ovako” izrazili su nadu da će i ostale bh. kompanije slijediti njihov primjer i nekom sličnom akcijom pomoći onima kojima je to najpotrebnije.

Agrokor preuzeo većinski udio u Mercatoru



Mercator

KONZUM
s Vama kroz život

Agrokor će za dionicu Mercatora platiti 120 eura, pod uslovima koji su određeni Ugovorom, što čini 240 miliona eura za 53,12% dionica Mercatora odnosno 452 milioa eura za 100%-tni udio u kompaniji.

Realizacijom Ugovora, zajedno s Mercatorom Agrokor će ostvarivati godišnje prihode od 7 milijardi eura te zapošljavati 60 hiljada ljudi. Ovo povezivanje ide u korist i na dobrobit kupaca, zaposlenika, proizvođača, zajmodavaca kao i ostalih dionika, te će njime nastati najveća maloprodajna kompanija u Centralnoj i Istočnoj Evropi. Komplementarnost kompanija dodatna je snaga i potencijal koji će omogućiti poboljšanje profitabilnosti kao i dodatnu finansijsku stabilnost te time ujedno omogućiti i daljnje širenje na tržištima regije, uz otvaranje mogućnosti za ulazak na nova tržišta.

Prigodom potpisivanja Ugovora Ivica Todorčić, predsjednik Agrokor koncerna, kazao je: „Zahvaljujem poslovnim ljudima, vlasničkom

konzorciju Mercatora, koji su odlučili iskazati nam povjerenje i dati priliku da zajedno s Mercatorom, koristeći zajedničku poziciju, podignemo efikasnost poslovanja i očuvamo zaposlenost te unaprijedimo konkurentnost u regiji i šire, na tržištu EU. Čestitao bih zaposlenicima Agrokor koncerna koji su svojim poslovnim iskustvom, motiviranošću, razvojnim ambicijama, a posebno vizijom stvorili temelje za istorijske iskorake.

Nova zajednička platforma znanja Konzuma i Mercatora, iskustva i predanosti ponudit će našim kupcima veću vrijednost širenjem asortimana, najboljim cijenama, boljom kvalitetom usluge i dr. Ovom odlukom najutjecajniiji poslovni ljudi regije pokazali su da u potencijalu koji se stvara spajanjem ovih dviju kompanija vide zamah budućeg ekonomskog rasta i uvjeren sam da će to biti odlična poslovna priča, ne samo za Sloveniju i Hrvatsku nego i za cijelu regiju.“

Gilles Mettetal, član Nadzornog

odбора Agrokoru u ime EBRD-a, dioničara Agrokoru, izjavio je: "Agrokor podržavamo od kraja 1990-tih godina. Agrokor je pouzdan partner Banke zbog svojih vrijednosti i snažnog menadžmenta. Drago nam je da se vlasnički konzorcij odlučio za Agrokor kao najboljeg kupca. Agrokor je već realizovao niz uspješnih transakcija u regiji i vjerujemo da će se ovom transakcijom stvoriti nova vrijednost, kako kroz sinergije tako i kroz dodatna ulaganja. Siguran sam da će EBRD i dalje s naklonošću razmatrati podršku budućem razvoju ovog uspješnog pothvata."

Dovršene transakcije podliježe mjerodavnim regulatornim odobrenjima, uspješnom restrukturiranju Mercatorovog duga i drugim ugovorenim uslovima. Očekuje se da će transakcija biti dovršena u ovoj godini. Nakon toga, Agrokor će u skladu sa Zakonom o preuzimanju objaviti obaveznu javnu ponudu za preostale nepreuzete dionice. (Klix.ba)

Energoinvest izabran među vodeće tržišne marke u BiH



Proces glasanja Superbrands Bosna i Hercegovina 2013/2014 uspješno je završen i Energoinvest je izabran među vodeće tržišne marke u našoj zemlji. Ovo glasanje je organizirao Superbrands, globalni i nezavisni branding autoritet koji provodi promociju i imenovanje najjačih tržišnih marki u 88 zemalja svijeta.

U ovogodišnjem izboru Superbrandova u našoj državi, pored dosadašnjih glasova stručnog vijeća, učestvovalo je više od 20.000 potrošača, što daje dodatnu vrijednost izabranima. Za najbolje se glasalo na osnovu kvalitete, prepoznatljivosti, dosljednosti i emotivnog naboja.

"Važno je naglasiti da će, zahvaljujući ovom priznanju, naša kompanija biti u prilici da svoje poslove predstavi i u našoj regiji", saopštavaju iz Energoinvesta.

Turci pokazali interes za ulaganje u Rudnik soli Tuzla



Premijer Tuzlanskog kantona Sead Čaušević, ministar industrije, energije i rudarstva Željko Knežiček i savjetnik Premijera Igor Rajner danas su primili generalnog direktora fabrike "Sisecam soda" Lukavac d.o.o. prof. dr. Ahmeta Kirmana sa saradnicima. Stabilno snabdijevanje i cijena slanice iz Rudnika soli Tuzla bili su u fokusu razgovora.

Predstavnici uprave jedine fabrike sode u regiji ovom su prilikom izrazili želju za proširenjem proizvodnje u koju su do sada na području Tuzlanskog kantona uložili 100 miliona eura. Preduslov za ovo, rečeno je ovom prilikom, su i alternativna nalazišta slane vode čime bi dugoročno bio osiguran kontinuitet snabdijevanja osnovnom sirovinom.

Gosti iz Turske pokazali su interes za ulazak u pregovore o dokapitalizaciji Rudnika soli Tuzla u kojem je 67 % državnog kapitala.

Delegacija Vlade TK pozitivno je ocijenila ovakvo rješavanje vlasničke strukture Rudnika soli Tuzla što bi u konačnici, prema riječima premijera Čauševića, riješilo i problem cijene slanice. „Nemamo veliku korist od Rudnika soli osim što je on preduslov za rad Sisecama“, kazao je Čaušević i potvrdivši da bi trebalo otvoriti temu dokapitalizacije Tetime.

Ovom prilikom bilo je riječi i o tome šta je do sada učinjeno i kakvi su planovi za deminiranje prostora oko Rudnika krečnjaka Vijenac.

Aluminij prodaje udio u FE-AL-u



Mostarski Aluminij objavio je [javni poziv](#) za prodaju svog udjela u poduzeću FE-AL d.o.o. Mostar te će na taj način izići iz suvlasništva u ovom gospodarskom društvu. Kako nam je kazao Darko Juka, predstojnik Ureda za odnose s javnošću Aluminija, njihov udio u FE-AL-u iznosi oko devet posto te je startna cijena 1,738.232 maraka.

"Naš udio u FE-AL-u, kao i startna cijena određeni su stručnim vještačenjem Nenada Krčuma, ovlaštenog sudskog vještaka. Kako smo objavili u javnom pozivu, svi zainteresirani mogu se javiti u roku 15 dana. Nakon toga slijedi nadmetanje i postizanje najbolje cijene. Sukladno zakonskim odredbama o pravu prvootkupa, najprije ćemo tu cijenu ponuditi FE-AL-u, a ukoliko oni to ne prihvate, tražit ćemo drugog kupca", pojasnio nam je Juka.

Prihodovna strana
Isto tako, u intervjuu koji je dao službenom časopisu Aluminija, direktor ovog Društva Ivo Bradvica kazao je kako su razlozi prodaje udjela u FE-AL dvojaki.

"Prvo, Aluminij od te zajedničke tvornice, tijekom svih ovih godina, nikada nije imao nikakvu korist s prihodovne strane. Drugo, prvi ljudi nekolicine naših drugih poslovnih partnera isticali su nam, u više navrata, kako favoriziramo širokobriješki FE-AL i jedino s njima, u mnoštvu otkuplivača, imamo zajedničku tvornicu, a od nje svejedno ne baštinimo konkretnu

korist", istaknuo je Bradvica. Nadalje, napominje da su shvatili kako se uistinu mogao steći takav dojam pa je na Nadzornom odboru Aluminija i donijeta odluka o izlasku ovog poduzeća iz suvlasništva u mostarskoj tvornici FE-AL.

"Naše ulaganje u taj projekt bilo je zemljište na kojem je tvornica izgrađena i slijedi nam stručna procjena vrijednosti našeg udjela", kazao je, između ostalog, Bradvica.

Gašenje proizvodnje

Uz ovo, podsjećanja radi, napomenimo kako se mostarski gigant nalazi u izuzetno teškoj situaciji te su za 17. lipnja najavili potpuno gašenje proizvodnje. Naime, čelnici Aluminija jednoglasni su u ocjenama oko nemogućnosti poslovanja pod sadašnjim uvjetima visokih cijena struje i niske cijene aluminija. Nakon objave te odluke, pozitivni signali dolaze sa svih strana, vode se intenzivni pregovori, ali još uvijek ništa od toga nije konkretizirano. Inače, samo u Aluminiju zaposleno je oko 900 ljudi, a u poduzećima koja su naslonjena na njega još nekoliko tisuća radnika. Uz to, Aluminij isporučuje sirovinu za više poduzeća u Hrvatskoj koja su izravno naslonjena na njega među kojima TLM, dijelom i Aluflexpack, pa bi zatvaranje Aluminija rezultiralo zatvaranjem tvornica u Šibeniku, Drnišu, Umagu, Zadru i Omišu.

INDEKS POTROŠAČKIH CIJENA

U martu 2013. godine opći indeks potrošačkih cijena porastao je za 0,1%.

Cijene proizvoda i usluga koje se koriste za ličnu potrošnju u Bosni i Hercegovini mjerene indeksom potrošačkih cijena, u martu 2013. godine u odnosu na februar 2013. godine, u prosjeku je viši za 0,1%.

Više cijene u odjeljcima odjeće i obuće, rekreacije i kulture, alkoholnih pića i duhana, ostalih dobara i usluga, hrane i bezalkoholnih pića, namještaja, kućanskih uređaja i redovnog održavanja kuće i prijevoza.

Posmatrano po odjeljcima prema namjeni potrošnje (COICOP), u martu 2013. godine u odnosu na februar 2013. godine, u prosjeku je zabilježen rast u odjeljcima Odjeće i obuće za 1,2%, Rekreacije i kulture za 0,5%, Alkoholnih pića i duhana za 0,2%, Ostalih dobara i usluga za 0,2%, Hrane i bezalkoholnih pića, Namještaja, kućanskih uređaja i redovnog održavanja kuće, te Prijevoza za 0,1% u svakom.

Niže cijene u odjeljcima stanovanje, voda, električna energija, plin i drugi energenti i zdravstvo. Posmatrano po odjeljcima prema namjeni potrošnje (COICOP), u martu 2013. godine u odnosu na februar 2013. godine, u prosjeku je zabilježen pad nivoa cijena u odjeljcima Stanovanje, voda, električna energija, plin i drugi energenti za 0,4% i Zdravstvo za 0,3%.

U ostalim odjeljcima prema namjeni potrošnje (COICOP), za isti period nisu zabilježene prosječne mjesečne promjene nivoa cijena ostalih nemetalnih mineralnih proizvoda za 1,6%.

U ostalim oblastima indeksi cijena se nisu značajnije mijenjali.

GODIŠNJA INFLACIJA U FEBRUARU 2013.

Cijene u martu 2013. u odnosu na mart 2012. godine u prosjeku su više za 0,6%.

Prosječni rast cijena je zabilježen u odjeljcima Alkoholna pića i duhan za 6,6%, Hrana i bezalkoholna pića za 1,4%, Stanovanje, voda, električna energija, plin i drugi energenti za 1,1%, Obrazovanje za 1,8%, Rekreacija i kultura za 0,9%, Ostala dobra i usluge za 0,7%, Restorani i hoteli za 0,3%, Komunikacije za 0,1%,

Namještaj, kućanski uređaji i redovno održavanje kuće za 0,1%. Snižavanja cijena u prosjeku su zabilježena u odjeljku Odjeće i obuće za 5,6% i Zdravstva za 1,7% te Prijevoza za 0,9%.

INDEKS OBIMA INDUSTRIJSKE PROIZVODNJE

Ukupna industrijska proizvodnja u Bosni i Hercegovini u februaru 2013. manja je za 5,6% od prosječne mjesečne proizvodnje u baznoj 2010. godini.

Proizvodnja u februaru u odnosu na prosječnu mjesečnu proizvodnju iz 2012. manja je za 4,5%, a u odnosu na proizvodnju iz februara 2012. veća je za 11,1%. Ukupna industrijska proizvodnja u periodu januar–februar u odnosu na isti period 2012. godine veća je za 6,3%.

U području "Vađenje ruda i kamena" proizvodnja u februaru 2013. manja je za 12,6% od prosječne mjesečne proizvodnje u baznoj 2010. godini.

Proizvodnja u februaru u odnosu na prosječnu mjesečnu proizvodnju iz 2012. manja je za 20,4%, a u odnosu na proizvodnju iz februara 2012. manja je za 0,5%. Ukupna industrijska proizvodnja u periodu januar–februar u odnosu na isti period 2012. godine manja je za 3,3%.

U području "Prerađivačka industrija" proizvodnja u februaru 2013. manja je za 11,2% od prosječne mjesečne proizvodnje u baznoj 2010. Proizvodnja u februaru u odnosu na prosječnu mjesečnu proizvodnju iz 2012. manja je za 9,8%, a u odnosu na proizvodnju iz februara 2012. veća je za 17,6%.

Ukupna industrijska proizvodnja u periodu januar – februar u odnosu na isti period 2012. godine veća je za 11,9%.

U području "Proizvodnja i snabdijevanje električnom energijom i plinom" proizvodnja u februaru 2013. veća je za 16,6% od prosječne mjesečne proizvodnje u baznoj 2010.

Proizvodnja u februaru 2013. u odnosu na prosječnu mjesečnu proizvodnju iz 2012. veća je za 24,7%, a u odnosu na proizvodnju iz februara 2012. veća je za 12,7%. Ukupna industrijska proizvodnja u periodu januar – februar u odnosu na isti period 2012. godine veća je za 7,6%.

Ukupan indeks potrošačkih cijena u martu/ožujku 2013. godine viši je za 0,1% u odnosu na prethodni mjesec.

Posmatrano po odjeljcima COICOP klasifikacije (Classification of Individual Consumption by Purpose), rast cijena registrovan je u odjeljcima: Odjeća i obuća za 2,8%, Rekreacija i kultura za 0,5%, Prevoz za 0,3%, Alkoholna pića i duhan i Namještaj, kućanski uređaji i redovno održavanje kuće za 0,2%.

Cijene su niže u odjeljcima: Zdravstvo za 0,7%, Stanovanje, voda, električna energija, plin i drugi energenti za 0,4%, Ostala dobra i usluge za 0,2% i Restorani i hoteli za 0,1%.

U ostalim odjeljcima cijene se nisu mijenjale u ovom mjesecu. Ukupan indeks potrošačkih cijena u martu/ožujku 2013. godine viši je za 0,3% u odnosu na isti mjesec prethodne godine kao i u odnosu na decembar 2012. godine. Za tri mjeseca ove u odnosu na isti period prethodne godine ukupan indeks potrošačkih cijena je viši za 0,6%, a u posljednjih dvanaest u odnosu na prethodnih dvanaest mjeseci viši je za 1,6%.

Ukupan indeks potrošačkih cijena u martu/ožujku 2013. godine je viši za 0,5% u odnosu na prosjek 2012. godine a u odnosu na prosjek 2010. godine viši je za 6,2%.

INDEKS INDUSTRIJSKE PROIZVODNJE

Industrijska proizvodnja u Federaciji Bosne i Hercegovine u mjesecu martu/ožujku 2013. godine u odnosu na prosječnu mjesečnu proizvodnju iz 2012. godine veća je za 9,1%, u odnosu na proizvodnju iz istog mjeseca prošle godine veća je za 11,3%, dok je u odnosu na februar/veljaču ove godine veća za 11,1%.

Ukupna industrijska proizvodnja u periodu januar/siječanj-mart/ožujak 2013. godine u odnosu na isti period 2012. godine veća je za 9,4%, u području Vađenja ruda i kamena manja je za 7,1%, u području Prerađivačke industrije veća je za 9,5%, i u području Proizvodnje i snabdijevanja/opskrbe električnom energijom i plinom veća je za 22,9%.

Prema glavnim industrijskim grupacijama industrijskih proizvoda u periodu januar/siječanj-mart/ožujak 2013. godine u odnosu na isti period 2012. godine, proizvodnja bilježi povećanje energije za 15,8%, kapitalnih proizvoda za 36,1% i netrajnih proizvoda za široku potrošnju za 6,6%, dok je zabilježeno smanjenje intermedijarnih proizvoda osim energije za 2,7% i trajnih proizvoda za široku potrošnju za 7,5%.

INDEKS PROIZVOĐAČKIH CIJENA INDUSTRIJE

Indeksi cijena proizvođača industrijskih proizvoda u Federaciji BiH od 2011. godine su izračunati u skladu sa Klasifikacijom djelatnosti BiH 2010 (Službeni glasnik BiH br. 47/10) i Nomenklaturom industrijskih proizvoda Bosne i Hercegovine 2010 (Službeni glasnik BiH br. 12/11 i 41/11).

Indeks cijena proizvođača industrijskih proizvoda se izračunava na bazi prodaje proizvoda proizvedenih u Federaciji BiH, a prodatih na teritoriji Bosne i Hercegovine (domaće tržište) i izvezenih na inostrano tržište.

U saopćenjima i publikacijama u 2012. godini, koje se odnose na indekse cijena proizvođača industrijskih proizvoda, publikovani su samo indeksi za domaće tržište, a od januara 2013. godine se redovno mjesečno objavljuju: ukupan indeks cijena proizvođača industrijskih proizvoda, indeks za domaće tržište i indeks za inostrano tržište.

Ukupan indeks cijena proizvođača industrijskih proizvoda u martu/ožujku 2013. godine ukupan indeks cijena proizvođača industrijskih proizvoda niži je za 2,2% u odnosu na prethodni mjesec.

Posmatrano prema glavnim industrijskim grupacijama ukupan indeks cijena energije niži je za 5,7%, intermedijarnih proizvoda osim energije za 1,5%, kapitalnih proizvoda za 0,2% i trajnih proizvoda za široku potrošnju za 0,1%.

Rast indeksa cijena je registrovan u grupaciji netrajni proizvodi za široku potrošnju za 0,1%. Posmatrano prema područjima KD-a, indeks cijena je niži za 8,4% u području Proizvodnje i snabdijevanja/opskrbe električnom energijom, gasom/plinom, parom i klimatizaciji, a u području Prerađivačke industrije za 1,2%. U području Vađenja ruda i kamena indeks cijena je viši za 0,1%. U području Snabdijevanja vodom; uklanjanja otpadnih voda, upravljanja otpadom te djelatnosti sanacije okoliša indeks cijena se nije mijenjao u ovom mjesecu.

Posmatrano po oblastima, najveći pad indeksa cijena je registrovan kod Proizvodnje električne opreme za 11,8%, Proizvodnje i snabdijevanja/opskrbe električnom energijom, gasom/plinom, parom i klimatizaciji za 8,4%, Proizvodnje koksa i rafiniranih naftnih proizvoda i Proizvodnje hemikalija/kemikalija i hemijskih/kemijskih proizvoda za 6,8% i Štampanja/Tiskanja i umnožavanja snimljenih zapisa za 4,2%.



Mula Mustafe Bašeskije 12/3, 71 000 Sarajevo

Tel; +387 33 264 830

Fax; +387 33 264 831

E-mail; info@upfbih.ba

Web; www.upfbih.ba